



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Centre-i CBI nem Kejriwal pudaktsütsü sentong yanglur

Toni Kroos Germany team nungi maneni asayatsü



VOL. XXI ISSUE NO. 132 (ADOK 132) DIMAPUR KÜPTOKNÜ (SATURDAY) TSÜKLA (FEBRUARY) 24, 2024 ₹ 5.00

## NITI Dimapur-i 100% Scholarship agütsütsü

Dimapur, February 23, 2024 (TYO): Nationalist Institute of Technology & Innovation (NITI) Dimapur Center-i kaketshir 100 nem Toppers' Reward Scholarship 2024 (TRS'24) agütsütsü osang metetdaksüogo.

2024 küm NBSE-i ketdangsüa agiba HSLC, HSSLC aser Nagaland University indang graduation tatidangtem (Science, Commerce & Arts) nung tematiba jenjang 10 anguba kaketshirtem nem 100% Scholarship agütsütsü.

Maneni Nagaland nungi CBSE Board tatidang agütsürtem rongnung 96% marks tema angur ajak nem 100% Scholarship agütsütsü ta Head of Center, NITI Dimapur Center Er. Rishav Sethi-i sangdong ka nung ashi.

Tatidang 10 nungi 100 Nagaland Toppers tenüngtem osangkakettem nung metetdaksütsü aser parnoki mark sheets agütsüba sülen April 30, 2024 tashi nung NITI Dimapur Center nung modular & career courses mashii ka

atema 100% sen meyipa agütsütsü.

Nagaland nung lanurtem ajungmesotsü atema corporate social responsibility ka ama sempettem agütsütsü. College aser School ketdangpurtemi pei pei kaketshirtem dang March 15, 2024 tashi nung tenüng züluoktsü mepishir ta NITI Dimapur Center-i metetdaksü.

NITI Dimapur aser Chumoukedima Centers nung NITI norms nung aliba kaketshirtemi MS Office, Tally, GST, C, C++, CSS, HTML, Hardware, Networking, Java, Advanced Excel, SQL, Dillpoma in Computer Applications, Graphic Designing, WordPress, AutoCAD, SketchUp, Stenography, Stock Market Investments, Digital Marketing amala course atema tenüng züluoktsü akok.

April 30, 24 nungi class tenzüoktsü aser tejangrartemi NITI Dimapur Center, Marwari Patti nung Er. Rishav Sethi den 7005291593/ 9436012641 ajanga tongteptsü akok.

## NCP MLA S Toiho Yeptho-i NLA Deputy Speaker inyaktsü

Kohima, February 23, 2024 (TYO): Nagaland Legislative Assembly (NLA) nung Deputy Speaker inyaktsü atema NCP MLA S. Toiho Yeptho shimogo.

NLA Deputy Speaker atema election nung S. Toiho den tetokteper shinga mali takok nguogo.

Pa ya Suruhuto Assembly

Constituency nungi tang mezüng atema MLA inyaker. February 27, 2023 nü Nagaland state assembly election nung pai taoba MLA & Tourism Advisor H. Khehovi (BJP candidate) madak takok ngua liasü.

Nagaland Assembly nung opposition mali aser iba jagi Deputy Speaker atema S. Toiho Yeptho ya

consensus candidate liasü.

February 26, 2024 nü 14 buba Nagaland Legislative Assembly indang session pezüububa nung pai Deputy Speaker tezüngzüktep agia mapa tenzüoktsü.

Nagaland Legislative Assembly nung NCP MLA 7 lir aser parnoki NDPP-BJP telokteper sorkar pusemer.

## Karbi Anglong nung nisungtem anientsü lemtet atema ashishiteper

Guwahati, February 23, 2024 (Agencies): Karbi Anglong Autonomous Council (KAAC)-i Professional Grazing Reserve (PGR) aser Village Grazing Reserve (VGR) tesemtem nungi nisungtem anientsü lemtet agiba atema Assam assembly budget session nung kanga dang sashia o asütepogo.

Karbi Autonomous Council-i Kheroni nung sorkar ali nung lidaktsür sorkar Gaon Burah 10 anentsüba atema Congress lennir Debabrata Saikia-i assembly session nung onük benoka lemsatep.

Sorkari shimtetba Gaon Burahs dena nisung aika nem KAAC-i eviction notices

agütsüogo ta pai ashi. Kheroni nung alirtem dak tenük yoka eviction notices agütsüogo aser iba ajanga nisung 10,000 shi dak kongshir. Iba tesem nung alir aika ket nung 1940 nungi lia aruba certificates lir aser National Register of Citizens (NRC) nunga parnok tenüng züluoka lir ta Saikia-i ashi.

Sorkar ketdangsürtem nungi iba atema osang balala lemsatepba ajanga assembly nung o atsüteptsü tenzüka liasü.

Yaküm Assam Chief Minister Himanta Biswa aser KAAC Chief Executive Member Tuliram Ronghang naprongi nisungtem manientsü ta nangzüka liasü. Ajsüaika tawa inyakba maparen

ajanga item tenangzüktep mali küm daksür aser nisungtem shisabuluteper.

O atsütepba mapang Assam Minister Jogen Mohan-i 1933 nungi Professional Grazing Reserve tenzüka ta shia nisungtem anientsüba sentong pusema jembii.

Nisungtem ozüng alema arua lir aser Gaon Burah temi teinyaktsü meinyakba atema anentsür ta Mohan-i ashi.

Iba onük ajanga Indian Constitution nung Arlla 14 (Right to Equality before the law), Arlla 15 (Right against discrimination) Arlla 19 (Right to settle anywhere in India) nung ajemdaker o atsütep tenzüokgo.

## Arangtet Tatidang 2024 takokertem metetdaksü



Ozükü nati sangdong ka nung iba osang sangoktsü.

Ao Riju-i PGDT 701-703 nung tatidang agütsür alir Roll No. 1, 2, 3, 5, 6 & 8-i iba takoker osang sangdongba anogo nungi ita ka tsüngda tashi nung Dissertation onük (Soft copy nung) office tongtsütsü atema metetdaksüogo.

Maneni Roll No. sülen \* aliba tetezü marks 80 sür tema anguba tamaitüsü alitsü aser takok angurtem nem Metsüremi 4, 2024 nü office nungi Marksheets agizüoktsü akok ta Ao Riju-isa ashi.

Dimapur, February 23, 2024 (TYO): Ao Riju-i achaayanga agiba Arangtet Tatidang 2024 (Aenjeti) takok angurtem metetdaksüogo.

February 23, 2024 nü Chairman Rev. Prof. Rongsen Lkr aser Secretary S. Wati

<b>ACT 201-202</b>	<b>Tatidang agütsür</b> : 2	<b>Takok angur</b> : 2
1st Division	: Roll No. 1 & 2	
<b>ACT 301-302</b>	<b>Tatidang agütsür</b> : 3	<b>Takok angur</b> : 3
1st Division	: Roll No.1, 2 & 3	
<b>ACT 501-502</b>	<b>Tatidang agütsür</b> : 3	<b>Takok angur</b> : 3
1st Division	: Roll No. 1, 2* & 3	
<b>ADT 101-103</b>	<b>Tatidang agütsür</b> : 8	<b>Takok angur</b> : 8
1st Division	: Roll No. 1	
2nd Division	: Roll No. 4, 6 & 7	
3rd Division	: Roll No. 5, 8, 9 & 10	
<b>ADT 201-203</b>	<b>Tatidang agütsür</b> : 5	<b>Takok angur</b> : 5
1st Division	: Roll No. 1, 2, 3, 4 & 6	
<b>ADT 301-303</b>	<b>Tatidang agütsür</b> : 12	<b>Takok angur</b> : 12
1st Division	: Roll No. 2, 3***, 4, 5, 6**, 8, 9***, 10, 11*, 13**, 14 & 16	
<b>PGDT 601-603</b>	<b>Tatidang agütsür</b> : 7	<b>Takok angur</b> : 7
1st Division	: Roll No. 1**, 3, 5*, 6**, 7 & 8*	
2nd Division	: Roll No. 2	

## Mongsanger semchirtem mezüngbuba mungdang aka



Mongsanger semchir mezüngbuba mungdang Ungma Tourist Centre nung akadang sentong nung shilem agirtem aser adenertem telok noksa tangokba angur. Mokokchung, 23rd, 2024.

Mokokchung, February 23

(TYO): Jamir kidong Mongsanger semchirtem mezüngbuba mungdang Tourist Centre, Ungma nung kaogo. Iba sentong nung yim trok (6) - Ungma, Changtongya, Wameken, Anaki Yimsen, Kelingmen aser Chubayimkü nungi Mongsanger semchirtem nütsüng aika adenshia kanga longsoa amung.

Iba sentong nung taoba Nagaland Chief Minister aser taoba Governor, Dr. S.C Jamir tetushi tesemdang asütsü jaoker liasü, saka pa maparen kar ajanga marutet nung, pa melena Development Authority of Nagaland (DAN), Chairman, Dr. Watizülu Süzümeren Jamir-i iba maongkaji agia sentong meraketsü.

Mongsanger semchirtem ya yim 6 tashi nung nütsüng aika perokshia lir, anungji, adianutem telungjem nung alitsü koda tajung

ta ashiba medem, tanü iba mungdang akaba ajanga Mongsanger semchirtem dang masü saka yim trok sanger, Ao kin aser Naga lima ajunga nung yimjung aser telungjem akatsü nükla yur ibai ayongzüka, ta Ungma nungi yimsüsür Onentiba Jamir Tatar-i metetdaksü. Mongsanger semchirtem Ungma nungi rashir küm 360 tama lir tanü temenungratsüka pelatepa ajuruteper, aji oda, tanü ya tetenzüker ka dang, tarutsü lanu putu nunga iba ama teti putepa alitsü onok tejangraba lir, ta paisa shisem.

Oboula nungi jakzüker kinunger aika Tsüngremi moaja arudar, ozü kinunger rongnung lenla balala nung lenir aika moaja lir, aser item dak alaka taoba Nagaland CM aser India tesem balala nung governor inyaksang Dr. S.C Jamir ama sotetdaksüba asoshi Tsüngrem tenüng tali

asanger, ta Changtongya nungi yimsüsür Imtitemsu Jamir Tatar-i metetdaksü.

Dr. Watizülu-i jembidang, Mokokchung ya 'mezüngpur' ta sür arudar, saka tanü putu repringdangra Mokokchung ji "mezüngpur" masü "tanitaker" lima ta shitetsüsa tia kati menepogo. Mapang kabo asen tsüraburi lenla balala nung mezüng süa aru, saka tanü asenok kechi jenjang nung lir, ta tebilemdangtsü onük kar asüngdanga liasü. Tanü asenok langzüngi lujenludar, aji "taku saka ochi o lir", ta ashi.

Taoba mapang tamangba yimsü perokba nunga asenok samanir liasü, tanübo Laishir degree tajung aser reverent angurbo aika lir, saka tanela jenjang kong lir? Ao lima sentep ki tuluba dang süteper saka sentepi aor mali.

(Maneni tapak 8 nung...)



## Mangkolemba nung consultative senden ka menogo

**Dimapur, Tsükali/February 23 (TYO):** SMDC, Government Higher secondary school (GHSS) Mangkolemba den lokti tentet balala aser district administration consultative senden ka February 22 nü Government Higher Secondary School, Mangkolemba nung menogo.

Iba senden nung School Auditorium yanglutsü, school den sendaktepba lenmang yanglushitsü aser school nung tesayur aser ministerial staff

tem agi anüngba indang sensaksema liasü.

Iba senden ya Chairman SMDC & Principal GHSS Sashikala lenisüba nung mena liasü.

Onük balala mapang talangka agia sensak asema sülen house-i School auditorium yanglutsü atema telemtetba agi aser iba atema committee ka tentetsü, kong ADC Mangkolemba mendenbuba asütsü, Principal GHSS member Secretary,

Executive Engineer PWD R&B, Mangkolemba Town students Union (MTSU) tir, MangkolembaTown Ao Lanur Telungjem (MALT) tir, Head GB aser Watsu Mangkolemba Unit tir züngsem asütsü.

School nung tesayur aser LDA cum Computer Assistant agi anüngba dak sendakba nung house-i ken o ya Mangkolemba Town Students Union-i teyari agüja ketdangsürtem dang abentsü telemtetba agia liasü.

## Longleng nung Scientific Advisory Committee senden menogo

**Dimapur, Tsüklai/February 23 (TYO):** Longleng nung 11buba Scientific Advisory Committee senden February 22 nü KVK training hall nung menogo. Iba senden nung Deputy Commissioner, Dharam Raj IAS mejeta jaoker liasü.

Senden nung o jembiba mapang DC-i, scientist tem dang tekong lu melena jenjang aketba medicinal crops tem tsünütsü atema lenmang tanga ka bushitsü ayongzük, kechiyong ali nung temo lir aser ano memenei lir ta ashi.

Paisa, allied department tem dang district nung aluyimertemi tsünüsenpongtsü tajungba tsünütetsü atema KVK den longjemmer inyaksü ajungshiba den mapa balala asoshi

administrative tsütsülen nungi takokba tashi teyari agütsütsü ta tenangzükba agütsü.

Iba sentong ya Dr. A.K. Singha Principal Scientist, ICAR-ATARI Zone VII, Umiam, Dr. M. Islam, Principal Scientist & Head cum Nodal officer KVK, ICAR RC for NEH region, Umiam aser Dr. H. Kalita, HORC, ICAR Nagaland centre, Medziphema nung densema hybrid mode nung agia liasü.

Kasa mapang nung 2023 küm atema KVK progress report, ACTO Dr. Lily Nguillie-i (Animal Science) agütsü aser 2024 atema Action plan Dr. Hari Charan Kalita, Senior Scientist cum Head, KVK Longleng-i agüja liasü.

Iba sentong nung Agri. aser

allied department nungi Scientist aser HOD temi shilem agi, kong aluyimertemi tebilemstü balala ajangshiba indang sensak asem aser parnok tebilemstütem bentetsütsü asoshi jenjang balala agitsüba indang sensaksema liasü.

Sentong nung Dr. Hari Charan Kalita-i SAC züngsemtem pelashishia agizük aser Yuimi Raising, STO-i tepela o jembiba liasü. Ajak senteper züngsem 26-i SAC senden nung shilem agia liasü.

Iba sentong ya Dr. Azeze Seyie, Scientist (Horticulture) lenisüba nung agi aser Scientist (Fishery), ICAR RC for NEH Region Nagaland Dr. Jyotish Barman-ia senden nung shilem agia liasü.

## Longleng nung training sentong ayongzükba agi

**Dimapur, Tsüklai/February 23 (TYO):** Longleng district kübok Births & Deaths Online Registration dak sendakba nung District Level Training sentong ka February 23 nü District Economics & Statistics Office nung agiogo. Training sentong nung registration unit balala nungi Registrar temi shilem agia liasü.

Sentong nung o jembiba mapang Deputy Commissioner & District Chief Registrar of Births & Deaths, Dharam Raj, IAS-i, births & deaths registrar tem indang shilem indang

jembiba liasü. Pai, birth certificates aiben magütsütsü ashi, kechiyong nisung ka khen dang asor aser asür, ta ashi.

Certificate aiben agütsüba aser nüburtemi agizükba dak sendakba nung DC-i, iba ya pei mapa shitak minyakba temaitsü aser tarutsü nungbo mataloktsüla ta ashi. Pai, asoba aser asüba naprongla indang record tejangja ayutsüla ta ashi.

Maneni DC-i, training sentong tembangba sülen registrar tem parnok mapa nung tedangshiba aser khuret

angateta tali tenendakba inyaksü imla ataba lmesatepa liasü.

Sentong tetenzüki R Thsanzo Yimchunger, Deputy Director & DESO, Longleng-i, DC & District Chief Registrar of Births & Deaths aser DES Kohima nungi shisalen sayur dang parnok mapang agütsüba atema kanga pelaba lemsatepa liasü. Paisa, trainee ajak metetpela liasü.

Iba sentong ya Amos Phom, IOS lenisüba nung agi aser DES Kohima Chonbeni Oren Patton shisalen sayur liasü.

## Wokha nung PMVK orientation sentong agiogo

**Dimapur, Tsükali/February 23 (TYO):** PM Vishwakarma dak sendakba nung field officials aser staff tem atema February 23 nü Deputy Commissioner Conference hall, Wokha nung workshop cum orientation sentong ka ayongzükba agiogo.

Training mapang General Manager, District Industries Centre (DIC) Wokha, Myingthungo Kikon-i, PM Vishwakarma Scheme indang nükjidong lemsatep aser ashiba agi, iba ya India sorkari amenokba central scheme ka lir, koba artisans aser teka mapa inyakerkem nongita yaritsü

asoshi lir, shirnok parnok teka agi mapa inyaker aser tangar kübok masü peisasa dang inyakerkem mesüra parnok indang business tenzüktsü merangertem lir.

Paisa, iba scheme ya artisans aser crafts men tem nem tool kit incentives, credit support, digital transactions atema incentives, parnok sempet arangtetshija aser shishilembadak lenmang lapokja parnok ajungkettsü nükjidong nung amenokba lir ta ashi.

Maneni pai, training nung shilem agirtem dang beneficiary tem züngoksema inyakyim ya

Common Service Centre (CSC) nung application benoka agitsü ta ashi. Application benokba mapang Aadhaar card, mobile number, bank details aser ration card amala kuli kakettem agütsütsü.

Maneni sentong nung Skill Development & Entrepreneurship I/C, Wokha Anuranjan Singh-i, scheme tajangzük aser shirnok temsüa lir iba indang metetdaksü aser District Manager, CSCe-Governance Services Indian Ltd. Wokha Achio Kikon-i registration inyakyim indang metetdakja liasü.

## Kohima nung enforcement agency balala senden amen

**Dimapur, Tsüklai/February 23 (TYO):** 18buba Lok Sabha Election 2024 dak sendakba nung enforcement agency balala indang co-ordination senden ka February 23 nü DC indang Conference hall nung menogo.

Senden mendenbuba DC Kohima, Kumar Ramnikant IAS-i, state nung yi aser sen amshiba tebilemstü indang lemsatep. Paisa, yi kanga bulua amshiba nokdangtsü atema elections agitsüba anogo sangdongba nü nungi SST amenoka jenjang tapet agitsü, ta

ashi. Election agitsü sangdongba anogo nungi tenzükba SST-i lenmang tongtibangtem ajak meita atatsü aser SST tem ya General Observer aser Expenditure Observer tem den sendaktepa DEO aser SP-i azüoktsü. IMFL/Beer/Country Liquor production, off take, licensed Stockiest stock limits, daily receipt aser retail sellers indang off take aser yi ayokba dokantem lapokba aser shibangba mapa ajak kanga junga meita atatsü, ta DC-isa metetdaksü.

## Meluri Nyusho session den repsema Nazhu benjung mungogo



**Dimapur, Tsüklai/February 23 (TYO):** 46buba Meluri Nyusho session den repsema Nazhu benjung tanabuba anogo Meluri Local ground nung mungogo. February 22 nü iba sentong nung MLA & Advisor N&RE and NSDMA, Z. Nyusietho Nyuthe alakteta jaoker liasü.

Sentong nung pai, pa kanga pelaba lemsatepba den Meluri nung aliba nüburtem asoshi

taküm ya takok tajung anguba aser temaotsüba küm ka asütsü imlaja ataba lemsatep. Paisa, tintet rogotem anema arishi talang liyonga aotsü imlaja ataba lemsatep.

Sentong nung sobaliba tsüingsang aser kentenba telok pongu nung tanur tai, tetsür aser teburtemi sobaliba asaya balala nung shilem agia liasü. Nazhu benjung ya MLA-i sobaliba jembiba ka apua tembanga liasü.

## Tseminyu DPDB senden menogo

**Dimapur, Tsüklai/February 23 (TYO):** Tseminyu District Planning & Development Board senden February 21 nü MLA aser DPDB mendenbuba, Ar. Jwenga Seb lenisüba nung DC conference hall, Tseminyu nung menogo.

Senden nung mendenbubai züngsemtem pelashishia agizük aser züngsem tasentem metetpela liasü. Mendenbubaisa taoba senden minutes tem lepa reprangshi aser iba sülen onük balala sensaksema liasü.

Sensaksema mapang community sanitary complex nung 4 sitters toilet (2 units) aser urinal shed yanglutsü benok, NST station Tseminyu nung 4000 litres capacity tzü tank ka yanglutsü, DC road office area nung community

waiting shed ka yanglutsü, Kandinu cultural society züngoksemtsü aser Tseminyu jila nung Traffic control point ana yanglutsü sensaksema liasü.

Kasa mapang nung Sr. Medical Officer, Tseminyu-i, power point ajanga Medical department inyakyimtem metetdaksü. Taruba senden nung Food & Civil Supply department-i parnok inyakyimtem metetdaksütsü tetuyuba agütsü.

M e n d e n b u b a i s a department tekolaktem dang parnok mapa nendaka inyaksü aser taruba DPDB senden nunga tamakok maludaksüü arua shilem agitsü mepeshia liasü. Iba senden ya mendenbubai tepela o jembiba sülen tembanga liasü.



23 फरवरी 2024

स्वतंत्रता भवन  
काशी हिन्दू विश्वविद्यालय, वाराणसी



February 23, 2024 nü Varanasi nung aliba Banaras Hindu University nung sempet agütsüba sentong nung Ato kilonser, Narendra Modi adenba noksa nung angur. Kasa noksa nung Uttar Pradesh Chief Minister Yogi Adityanath-a angur.

PM leniba kübok linük rongsenketzüng jenjang junga kümogo: Sitharaman

**New Delhi, February 23 (Agencies):** Hokolbarnü Union Finance Minister, Nirmala Sitharaman-i, alima nung rongsenketzüng tulutiba linüktem rongnung India jenjang 10buba nung liasü, ajisüaka Ato kilonser, Narendra Modi lenisüba kübok tangbo jenjang 5buba kümogo, ta ashi. "Taruba küm ka ser tesadang tashi nungbo asenok jenjang tasembuba akümtsü. Rongsenketzüng jenjang junga aliba linük ka nung sensotem libaliro jenjang junga lir aser ibaji ajanga ajak tajanzük angur," ta lai metetdaksü. BJP lenir tain, Sitharaman-

isa, linük nung nüburtem ola angaba sorkar mezüngbubaji iba sorkar ya lir; nüburtem ola angaba sülen sorkari asalentong yanglur aser mapa küma inyaker; item schemes ajanga nüburtem ajanzükdaksütsü atema inyaker, ta ashi. "Party nung inyaker tilatiba katia party nung inyakba ajanga temaba jenjang tongtetba party ji BJP lir," ta laisa metetdaksü. Opposition INDIA teloktep raksaogo; noksa kija tangokba ajangabo kecha majanzükttetsü, ta Union Finance Minister-isa metetdaksü. "Joko parnoki (Congress lenir

Rahul Gandhi aser Samajwadi Party Tir Akhilesh Yadav) nüburtem dang ashitsü kecha makai kümogo. Ato kilonser Modi-i aluyimertem atema kanga bilemtsür. Tesüiba küm 10 tsüngda pai aluyimertem atema aika inyaksüogo. Tesüiba küm 10 tsüngda BJP-i ochimashi maliba sorkar agütsüogo," ta laisa metetdaksü. Uttar Pradesh kübok Maharajganj district nung credit outreach programme kübok nisung 40,011 nem sen crore 1,143.05 loan agütsütsü atema Sitharaman-i iba district semdanga liasü.

Kamal Nath-i Bharat Jodo Nyay Yatra nung shilem agitsü ayonger

**New Delhi, Tsüklai/February 23 (Agencies):** Hokolbarnü Congress lenir tain aser taoba mapang Madhya Pradesh Chief Minister, Kamal Nath-i social media ajanga Madhya Pradesh nung alirtem aser party nung inyakertem dang Bharat Jodo Nyay Yatra nung shilem agitsü ayongzük. Tawa Kamal Nath aser par jabaso Chhindwara nungi MP, Nakul Nath nati Congress party toktsür BJP nung adentsü, ta osang prokshia liasü. Kamal Nath-i X ajanga, Madhya Pradesh nung nüburtemi iba Yatra yongyar, ta metetdaksü. Nath-i, "Ozü lenir Rahul Gandhi-i linük tesem ajaklen yimi-yimdong nung jajar aser tim masüba anema raratsü sangdongogo," ta metetdaksü. Paisa, "Ni Madhya Pradesh nung alirtem aser Congress nung inyakertem dang Bharat Jodo Nyaya Yatra nung longsoa shilem agiba ajanga Rahul Gandhi ama tashitait aser tasütait akümtsü ni ajungshir. Asenok longjemer iba sentong nung shilem agiba ajanga tim masüba anema raraba

ya tembangdaksütsü," ta metetdaksü. Osangbener den jembidang Congress lenir kati, March 2 nü Kamal Nath-i Gwalior nungi iba Yatra nung shilem agitsü aser March 6 tashi pai shilem agitsü, ta metetdaksü. Madhya Pradesh nunga iba yatra ya March 2 nü tenzüka Gwalior, Shivpuri, Guna, Rajgarh, Shajapur, Ujjain, Dhar aser Ratlam nung agiba sülen March 6 nü Rajasthan nung tenzüksü. Tawa Nath aser par jabaso nati Congress toktsür BJP nung adentsü ta osang proka liasü. Talisa BJP State otongdar, Narendra Saluja-i social media ajanga Kamal Nath aser Nakul Nath na noksa den 'Jai Shree Ram' ta lemsatepba sülen iba osang tali proka liasü. Kamal Nath aser par jabaso Nakul Nath nati BJP nung denra Congress MLA tem aser taoba mapang MLA tem 12-ia BJP nung adentsü, ta osang ka ajanga metetdakja liasü. Kamal Nath aser par jabaso nati BJP nung madenyonga Congress MLA tembo aikati BJP nung denogo.



February 23, 2024 nü Patiala district kübok Punjab-Haryana Shambhu arrtsü nung aluyimertemi 'Black Day' ayongüka longkak aitdang tangokba noksa nung angur. Khanauri border arrtsü nung longkak aiter aluyimer ka khasetba anema parnoki Black Day sangdonga longkak ait.

Centre-i CBI nem Kejriwal pudaksütsü sentong yanglur: Gopal Rai

**New Delhi, February 23 (Agencies):** Hokolbarnü AAP lenir aser Delhi minister Gopal Rai-i, BJP-i aniba central sorkari CBI ajanga Delhi Chief Minister, Arvind Kejriwal nem notice agüja pa aputsü atema asalentong yanglur, ta metetdaksü. New Delhi nung osangbenertem senden ka nung jembidang Gopal Rai-i, CBI-i CrPC 41A (Police officer matsüngdangi arutsü notice) kübok Delhi Chief Minister Kejriwal atema notice ka renemdar, ta metetdaksü. "Opposition party temi INDIA teloktep yangluba

mapang nungi BJP jashir," ta pai ashi. "BJP-i aniba central sorkari CBI ajanga Arvind Kejriwal nem notice ka agüja pa aputsü atema renemdar. CrPC 41A kübok notice ka renemba onoki metetogo; iba sülen parnoki pa aputsü merangtsü," ta Rai-i metetdaksü. "Enforcement Directorate-i Kejriwal nem agütsüba notice ajak tamakok angu, anungji tang parnoki (sorkar) CBI tim masüba nung amshitsü meranger," ta pai ashi. Central agency temi AAP lenirtem dak sendakba tesem aika mita aoer, ajisüaka AAP

lenirtem anema ochimashi kuli kecha mengutet, ta pai metetdaksü. "Item central agencies-i ozü lenirtem meyong ki aser office tem dang masü saka parnok den sendaktepa aliba tesem aika mita ogo, ajisüaka parnoki onok anema ochimashi kuli kecha mengutet. AAP-i kodanga BJP aser parnok agency temi amokmerenba tsübua maru aser tarutsü nunga onoki parnok metsübuttsü," ta pai ashi. "INDIA teloktep nung shilem ka ama AAP-i election nung tokteptsü aser shingaiia onok menokdangtetsü," ta paisa shisem.

Mapa manguba agi AP nung nisung 21,000 soseta süogo: YS Sharmila

**Vijayawada, Tsüklai/February 23 (Agencies):** Andhra Pradesh nung nüburtem atema mapa manguba tebilemtsü ya tebilemtsü onük tuluka kümogo; state nung küm pongu tsüngda mapa mangur 21,000 soseta süogo, ta Andhra Pradesh Congress Tir, YS Sharmila-i ashi. Vijayawada nung Congress party office kima party-i longkak aitdang Sharmila-i, "Tesüiba küm pongu tsüngda mapa mangur 21,000 soseta süogo ta survey ka ajanga jangjaogo. Iba ya sorkar tamakok ajanga masü no? Mapa mangur lanur jenti asüba ya shirnok tai ajanga? Parnok asübaji tang aliba sorkar ajanga lir," ta ashi. Laisa, graduates aser post-graduates densema mapa mangur aika taa tera dang agia mapa inyaker, ta ashi. "Chandrababu Naidu indang kümsük tembangba mapang nung mapa tazüng lakh 1.40 liasü. Kechiba Jangan-i aniba sorkari mapa tazüng atema nisung meshimmer? TDP yimsüsüba mapang nung mapa

tazüng 7,000 atema Jagan-i longkak aita liasü," ta lai ashi. Andhra Pradesh Congress Tirisa, "Tang aliba sorkari taoba mapang nungbo sorkar mapa lakh 2.30 atema nisung shimtsü ta nangzüka liasü. Parnokisa küm shia job calendar agütsütsü ta nangzüka liasü. Parnoki tesayur 23,000 shimtsü atema DSC notification agütsütsü ta sangdonga liasü. Sorkar tasenba tentetba sülen küm pongu jungogo saka item tenangzükba ka danga mapa küma meinyak," ta metetdaksü. Jagan Reddy aser Kumbakarna na medemdanga Sharmila-i, "tesüiba küm pongu tashi pa amoi oa liasü asü?" ta asüngdang. Jagan Reddy kümsük mapang nung mapa lakh 1.20 atema dang nisung shima liasü, aser parnok teimbaka sorkar volunteers liasü, ta lai ashi. "Tangbo kaketshirtem aser mapa bushirtemi 'kechiba yamai ashioktsür?' ta asüngdang. Küm aika item exam atema nisung lakh aikati sen lakh aika indokogo," ta lai ashi.



February 23, 2024 nü Solapur nung aliba Chhatrapati Shivaji Maharaj Government Hospital kima Maharashtra State Association of Resident Doctors (MARD) nung züngsemtemi 'allowance' atema takhangba agüja longkak aitdang tangokba noksa nung angur.





## TIR YIMYIM YIMOBILEM (EDITORIAL)

DIMAPUR

KÜPTOKNÜ

TSÜKLAI 24, 2024

### Taneptsü maginer !

**A**ssam nungbo Khristantemi taneptsüba sentong 'Healing Crusade' ayongzüka akaba ya Chief minister Himanta Biswa Sarma anir kanga sashia anema apusadagi, anungji Yisu tenüng nung aneptsütsü sarasademba mapatem ajak Assam nungbo ozüng anema inyakba mapa ka akümtsü. Ibaji dang masü saka ano Yisu dak mamangba purtem teloki Assam nung Khristan-temi lapokba kaketrejutem nung Yisu aser tetsü Mary noksa mayutsü aser Khristan yimsü nung lokti tekülem mapang magitsüla ta ozüng agüja lir. Himanta-i Naga nungertem dang okra ta ajar aser Khristan-temi limapurtem taneptsü sentong ayongzüka ajanga temulung meyipa Khristan kümduksür, anungji Assam nung Khristan-temi taneptsü ayongzüka sentong ya ozüng anema inyakba mapa ka asütsüsa pai inyakogo. Aji oda, Assam Chief ministeri Naga nungertem dang okra shia menütsür aser Naga nungertemi amangba tamangba yimsü renloka moudaktsütsü asoshi nokdanger. Ajisüaka, asenokbo Nagaland nung tulubai anir pa bushia Assam-leni lupet alur aser mapa aika nung pai ashi angatsüsa akümer, kechiyong pai ashiba mangara asenok chiyonga athitsüba tia nung lir. Aben jagi, election mapanga pai mulungba sülen anidaktsüsa akümer aser ano tanga Lok sabha election nunga, ashiko, Nagaland nungi yoktsübabo paiang shimtsü akok. Iba tashiji pa dak tashi lir. Iba ama tashi akaba nisung kati Assam nung Khristan-temi mamangba purtem mesüzüka Khristan kümduksür ta aija, joko, ozüng agi merenshitsü sentong yanglubaji Khristan-tem asoshi tamang tendangba mapang tajung ka asütsü. Atangji, asenok ama Naga Khristan-tem asoshibo aji tetsübuttsüka, anungji aikati metizüktettsü. Ajisüaka, alemli tenyartem mapang nungi Yisu temeim osang tajung prokshia aoba ya Khristan-tem reshikangshitsü tenzükba nungi atalokyonga aruba asenoki angur. India ya alima nung nisungtemi amangba tamangba yimsü ajak sademsadema külemdak aser sayudak ka asütsüsa linük temzüng yanglurtemibo lateta yuja lir. Ajisüaka, tang taoba küm ishika tsünga da state aika nung mamangba purtem shinga Khristan mekümtettsüsa ozüng latetogo. Shitakba agibo, ajiang linük temzüng - ozüng alema inyakba mapa ka asütsü. Assam nung dang masü saka alima ajaklen Khristan-temi takar tulurtem masü saka teküpbok tia nung alir sensaker aser timtemertem nem parnok nungdak ajak agüja yarir. Parnok nem kaketshisatsü agütsür, mozü ki lapoka taneptsü agütsür aser senotsü, abensüoshi aser chiyongtsü agia yarir. Ibaji Tsüngrem temeim jungkai adoka sayutsüngiba mapa ka lir. Item temeim mapatem jagi teküpbok tia nung alirtem shisatsü, temetetba aser tangatetba nung nüchi akümer aser Tsüngrem temeim angateta temulung meyiper. Ajisüaka, India nung Yisu dak mamangba kin tulutemi kin tilatem ya Khristan kuma moudaktsüner, kechiyong parnokbo taso dang nungi kin shia pei mapa tapu balala lemsüka lir. Aji oda, purtir kinji teti putirsa asütsü aser yimsüsür kinji teti yimsüsürtemsa asütsü, iba amaji kin tila purtem taküm piyong mapa tapu balala lemsar kin tulu purtem tenzüka alitsü. Khristan yimsüi aji raksatsür, anungji mamangba purtemi mepelar. Iba jagi India nung mamangba purtem Khristan mekümdaktsütsü asoshi "Anti Conversion Law" latetba sülen, ano tang Assam Healing (Prevention of Evil) Practices Act lateter asütsü. Atangji, Khristan-temi yimten yimsüsürtemi latetba ozüng anema nokdakba agi ozüngji magientettsüa akok. Ajisüaka, tanela khuret abenba Khristan-tem asoshi ibai tanela tongpang tuluka asütsü. Khristan-tem katibo Himanta dang Yisu temeim indang shir asü mashiar memetet, meshika alinunga tang ya pa dang Yisui naa aneptsütsü aser kümzüksü ta tonga oa ashitsü mapang tajung ka lir. Asenoki aiben yangi shisemba ama, tanela anir aruba mapa ya sensaker aser tilartem rongnung dang inyaker, iba jagi tulur aser takartemi mangateter südi. Hau, alima nung mamangba purtem rongnung takar aser tulur ajurutsüba temela masütsüa akok, anungji tang amai Khristantemi inyakba mapatem anemer yimsüsürji tanela sempet akaba Khristan telok kati ajurua Yisu temeim aser Pa taneptsüba taochi tashi indang shia sarasademtsüra, Tsüngremi pa dang aochia taneptsüba mapa anemsang toang taneptsü tuluba angutsüa akok. Tsüngremi yamajisa inyaker.

## OLEMSABANG

### Kiset shiruru mesüba nung tangazüktsü

Dr. Merennungba

(Yashi adok nungi...)

2. Ki atem (Floor) cemented/concrete asütsüla. Ali nung dang mesüra tsüla-i (Earth worm) tapok meja-a atoka tashitak adoktsü. An kanga nungtepa mayutsüla kechiaser parnok normal temperature kanga atsükba ajanga mopung tamajung (Ammonia gas) atokba (Evaporate) agi yakta tulu makumtsü.
3. An tasen mesütsü meinokdang tamasa shinü (lime Powder) enokang, iba-i disinfectant atema dang masü saka parnok soyima chiyongdang calcium peria ngüa teret (bone) tashi ita aintsü (About 38% of calcium can be extracted from lime stone). Iba (lime powder) inokba sülen bedding material enokang. Tsüksü (paddy husk) tajungtiba asütsü. Kechiaser saw dust karbo mesen-i chinüba lir aser ibai ajanga mesen (Parasites) karbo pokteta infection asütsü akok.
4. Anogo shia ki meruka mozü (Chemical agents such as phynol, Dettol) etc agi disinfect süang.
5. Jang, tzü agütsüba auso teti merüka yang (feeding & watering trough).
6. Mapang shia vitamins aser mineral mixture agütsüba agi yakta aintsü.

#### TASHITAK TEKÜMDANGTSÜ

An tashitak aika lir item ajak rongnung takoksa tulutiba aser asen limai mapang shia arubaji dang tashibo Ranikhet disease aser fowl pox disease ya lir.

Alima nung Ranikhet tashitak mezüng putetbaji Ranikhet (UP) India lima putet. Anungji iba dang ya Ranikhet tashitak ta ajar. Asenoki iba dang an wara ta ajar. Iba tashitak ya mesen (Virus) tapu ka ajanga atoker. Iba mesen ya mopung agi bener senzür, iba den an ya tashi tila den azü (blood) ishika dang. An atema iba mesen ya kanga tesashi. Anungji anogo ishika tsünga da kiyong (colony) nung an shiranga asütsü (mortality rate is 100%), iba tashitak atema tanü tashi taneptsü mozü mali. Iba tashitak yagi alima tesem balala nung an mesür takoksa tulu ajuruogo. Iba tashitak nokdangtsü atema lenmang ka dang lir aser aji R.D. Vaccine agiba ajanga nokdangtsü. Iba vaccine ya tapu ana (2) lir F Strain aser R.D. (live) Vaccine lir.

F. Strain Vaccine ya techanu entsü nungi atokli agi tajungba kokra anogo 2/3 tsünga bosa agitsüla. Kodang ibai mapang shitak nung agidir kümzüka alitsü. R.D. Vaccine ya ita ana, asem tsünga agira wara nungi kümzüksü.

Tanabuba tashitak ya fowl pox tashitak lir. Iba tashitak ya mesen (Virus) tapu ka ajanga atoker. Iba tashitak yagi Ranikhet ama tasüba majurutsü akok. Saka mesen ya mopung nung senzür asünung mapang tatsüka tsünga da kiyong (Colony) nung An alir ajak atongtsü akok. Iba tashitak yagi tekolak, teni, tepang aser tetsüng waka komo adoktsü. Tasüba ya tenük poker chiyongtsü manguba, aser teni, tepang, terok, (oesophagus) item ya komo agi wakbanga chiyongtsü mechitetba, tangu mesashitetba ajanga asütsü. Iba tashitak yagi techanu teimba asütsü. Kechiaser techanuji shi lanu aser teni tepang lenmangji temesüba (Narrow passage of respiratory and gastro intestinal tract). Iba tashitak nungi kümzüka alitsüji fowl pox vaccine agiba ajanga dang kümzüksü.

Tanga tashitak nungi kümzüka alitsü atema mapang shia vitamins aser mineral mixtures aser tashitak nokdangtsü mozü agüjang (oxytetracycline powder is use for both prevention and treatment. It is broad antibiotic and widely use for poultry bird). Item tashitak agi asür yamai endoktsüla. Ongken tatsüba agi feet asembose (3ft) atutsüla. Iba sülen shinü (lime powder) ongken atem (floor) aser jara meküta prokang aser tasümgangji inokang. Ano tasümgang tema nungjia shinü (lime powder) agi nembanger külenang ali agi junga yapanga yuang. Yamaji masü nungbo tsüla aser tanga mesentemi tapok yanglua adoker tanaben tashitakji mopungi prokshitsü. Shiranga aliba An kiji jung junga disinfect süang. Bedding materials junga oktener tasümgang aremba yimya nung rema yüang. An ki aser parnok chiyongba, tzü ajemba (feeding & watering trough) junga tamalen shia aliba ama mozü agi shidoker külenang an tasenji enokang. Yamai inyaktet nungbo kiset shiruru metsürtemi takoksa majurutsü.

( Iba ocet ya Ao Baptist Arogo Padum Pukhuri-i adokba Ranglok Kaket July 2021 Adok nungi agitetta adoktsür ).

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir



# Greece nung kasa kiyimtsü melaba ozüing Arogoi aitsür



February 15, 2024 nü Athens nung Marriage Bill atema Parliament nung o entepba mapang Greek Ato kilonser, Kyriakos Mitsotakis-i jembitsü atema sabangi arudang tangokba noksa nung angur.

**February 23, 2024:** Tawa Greek Parliament nung tetsür o tetsür na mesüra tebur o tebur na kiyimtsü melatsü atema vote agütsütepba agizükba Arogoi aitsüogo.

Greece Catholic bishops' conference secretary general, Josif Printezis-i, "Onok tangatetbaji tejangja- Arogoibo kasa kiyimba magizükteter. Sorkari kanga kera iba telemtetba agiba ajanga onok süngmanger," ta metetdaksü.

Paisa, "Athens nungi nüburtemi iba takhangba agüja liasü asü maliasür ni mejangja, ajisüaka Greece nung alirtemibo iba ya magizükteter. Iba ya ajanga baptiba aser tekülem tsütsü onoki timtem aika ajangshitsü," ta metetdaksü.

February 15, 2024 nü Ato kilonser Kyriakos Mitsotakis-i aniba center-right sorkari kasa kiyimtsü melatsü atema vote agütsütepa iba ozüing agizükba sülen tang mezüing Greece nung kasa kiyimba sentong agiogo.

Archbishop, Josif Printezis-isa, tamalen Mitsotakis-i aniba sorkari Khristan tesayuba agizükteter liasü aser Greece nung Orthodox Arogo den tesendaktep junga liasü, ta ashi.

Sorkaria kasa kiyimba ozüing anema liasü, ajisüaka European Union-i kasa kiyimba melatsü atema rongshi asütsüa akok, ta pai ashi.

Paisa, pa den tongti putirtemi

kasa kiyimertem atema koma inyakshitsüar Arogotem dang tuyutsü, ta metetdaksü.

2023 küm June ita nung Mitsotakis-i aniba party-i tanaben takok anguba sülen kiyimba ratet melenshitsü atema taküm February ita nung Parliament nung Marriage Bill benoka liasü, aser ibaji left-wing MP temia pusema liasü.

Yaküm December ita nung survey ka agiba ajanga yamai bushiteta liasü- kiyimba ozüing yanglushitsü atema benokba ozüingji Greek nung shilem 52-i pusem, shilem 33-i iba ozüing anema liasü aser shilem 15-i tangatetba kecha melemsatep.

Taküm January 12 nü Greece Catholic bishops-i sangdong ka ajanga, "Kiyimba aser kibong teratet melenshibaji ajanga Greek nung loktiliba ajak mejungi kongshitsü," ta metetdakja liasü.

"Iba ozüing benokba ya ajanga asen sobaliba jenjang majungtsü. Greek nung sobaliba ajemzüka aluba tetenzüker asütsü," ta parnokisa metetdakja liasü.

Kasa kiyimba ozüing benokba anema January 30 nü Greece nung Orthodox Arogoia yimjak nung shidi ka ajanga MP tem dang "Iba ya Khristan kiyimba aser akhidang nungi Greek nung kibong teratet nungi pilaba lir," ta metetdakja liasü.

Athens Parliament nung

menden 300 lir. Anogo ananü tashi kasa kiyimba melatsü atema o entepa aruba sülen kasa kiyimba melatsü atema vote 176 agüja liasü aser iba ozüing anema agütsüba vote bo 76 dang liasü.

Tang European Union nung züingsem linük 27 lir aser item linüktem nungi Greece densema linük 16-i kasa tetsür o tetsür na aser tebur o tebur na kiyimtsü melar. Alima nung kasa kiyimtsü melaba linük 37bubaji Greece kümogo.

Interview ka nung jembidang Archbishop Printezis-i, MP temi agiba telemtetbaji ajanga Greece nung Arogo tashi samaba sayur, ta metetdaksü.

Ajisüaka Orthodox lenirtemi maneni local sorkartem dang kasa kiyimba memelatsü atema takhangba agütsütsü akok, ta paisa metetdaksü.

Iba ozüing tasenba anema longkak aitba ajanga Catholic Arogo aser Orthodox Arogo longjemdaksür, yamaji tanga lenla nunga Arogo ana longjemtsü imlar, ta pai ashi.

Osangbener den jembidang pai, "Iba ozüing benoktsü atema o lemtep tenzükba mapang nung Orthodox Arogoi onok (Catholic) dang parnok pusemstsü mepishia liasü. Ajioda onoki iba onük nung Orthodox Arogo pusemogo," ta metetdaksü.

# CSI Arogoi India nung aluyimertemi longkak aitba pusemer

**February 23, 2024:** Church of South India (CSI) Madhya Kerala Diocese-i tang Delhi arrtsülen nung aluyimertemi longkak aitba pusema yimjak nung sangdongogo.

CSI Madhya Kerala Diocesan Department of Ecological Concerns nung Chairman aser Bishop, Malayil Sabu Koshy Cherian-i sangdong ka ajanga sorkar dang aluyimertemi akhangba onük agizüktetsüla, ta mepishia metetdaksü.

"Onoki aluyimertemi longkak aitba pusembaji ochi temeden,

kasa züingshiba aser asen linük nung aluyimba sector tajungba akümtsü atema onoki pusema temaitsü lir," ta pai metetdaksü.

Cherian-i, item ozüingtem ajanga aluyimba tsütsü inyakyim jenjang tamajungba akümtsü aser aluyimertem nungitba democratic inyakyim jenjang majungtsü, ta aluyimertemi arendaka bilemer, ta metetdaksü.

"Aluyimertem ya asen linük tongtoret lir, ta CSI Arogoi bilemer. Iba tangatetba nung ajemdaker CSI Madhya Kerala Department of Ecological

Concerns-i aluyimertem temeden kümzüka ayutsü atema inyakyim latettsü akhanger. Onoki sorkar dang World Trade Organisation tezüingzüktep nungi pilatsü mesüra aluyimertemi züsentetbatem nung jenjang shidak agütsüsü atema telatetbatem reprangshitsü mepishir," ta CSI Arogo sangdong ajanga metetdaksü.

CSI Arogoisa alu nung aayangertem aser kanga sensaker aluyimertem atema pension schemes tenzüktsüla, ta sorkar nem takhangba agütsü.

# ANOGO ABEN TSÜNGREM DEN

## Temeimi tashi angaba bener arur

*Shiba den kü ozüing lir, aser aji benshir pai ni meimer: aser shibai ni meimer kübui pa meimtsü, aser ni pa meimtsü aser ni küsasa pa dangi jungkai adoka sayutsü. Yohan 14:21*

Tsüngrem ozüing meimbaji ne mulungjang nungi adoker. Kodang nai Tsüngrem dang tashi angatsü timtemdir, ibaji ne mulungjang Tsüngrem nungi pilaba tamaitsü lir. Kari ashir: "Ni Tsüngrem meimer, saka dang tashi angatsü timatemer." Tanelaren ibaji tamakoktsü. Kari ne dang "Nai Tsüngrem meimer asü?" ta asüngdangra nai yakta langzütsü, "Au ni meimer." Ne dang, "Nai Tsüngrem dang tashi angadir ma?" Nai au ni tashi angar ta langzütettsü asü? Temeja Tsüngrem meimbaji temulungjang ajunga agi Tsüngrem dang tashi angaba dangi anir. Nai nübuttsü dang mapang mapang nung meimra, ne tesendaktepji shidak masü. Tesadang meimba aser tesadang tashi angaba Tsüngremi magizüker.

Temeim medeni tashi angabaji ozüing mapa lir. Pei atema dang tashi angabaji pei sasa tabensa akümba, koba agi asüküm dangi anir. Tekümdang Khristantemi Khrista dang tashi angaba dang nungi parnok taküm nung tazüokba akatsü meranger. Tazüokba jagi Tsüngrem meimba mendenji agitsü makok. Tsüngrem ne temang meshia aliba, ne moral libaliro aser na arogo mapa nung shilem agiba atena oa ne mulungjang repranger.

Ne tekülem tazüingla aser mapang ataktetta ayuba tekülem ka dang akümer asü? Tsüngrem O azüingba metetta arur asü? Ne sarasadem waluk watemba ka dang akümer asü? Idakji ne mulungjang Tsüngrem nungi melenshiba tamaitsü lir. Temeimji Tsüngrem den telungjem akatsü aser Pa tenzüktsü asoshi jangradaktsüba tulutiba lir.

## SANGDONGER

Tuli town temeküt nung aliba arogo trok telungjemi 2002 küm nungi tenzüka "Grace Rehabilitation home Tuli, tenzükür küm 21 buba tashi inyaka arudang temesepba chiyungtsü tapu balala achirtem nisung meririjang ana tema yaria aruogo aser tanga kasa mapaji Tsüngrem taochi nung inyakdagi, anungji asen adianu kar mim mozü achiba, yi ajemba amala nungi taneptsü aginüa aser teyari nungdaka lira lenmang sadema lapoka lir ta nübur ajak den lemsateper.

**Arogotem tenüing** :- Aopenzü Baptist Arogo, Aitlenden Baptist Arogo, Tuli Town Baptist Arogo, Tuli Lenten Baptist Arogo, Tzüdikong Baptist Arogo, Luyong Baptist Arogo.

**Tongtepratep** : P.B. Wati Jamir Chairman (A.K.S) 8974799736 Bendangmongba Secretary (A.K.S) 8731982881



February 13, 2024 nü Russia nung sepaitemi Ukraine kübok Kalanchak yimdak nungi nung Orthodox Arogo nung putir, Rev. Stepan Podolchak (arrshi küm 59) puer aoba sülen anogo ishika lir pa tasü mang ngutetogo. Pa kolak nung injang zübo ka aser temang nung tanga tarak-a liasü.



AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Songang

(n) taküm sangnu manga tapu ka ( a kind of house fly)
\* Ngashi alidak manga songang kanga arur.

Songbang

(v) atsübang (fenced)
\* Süngdong tila ajak süng agi songbang.

OLONG PAITEP # 6707

Grid for Olong Paitep # 6707 with numbers 1-19 in various cells.

TIPIEN

- 3. Tetenzük masü - (5)
5. Tebur chanu - (6)
6. Temeshi lima - (5)
8. Tsük benden - (3)
9. Mitsü - (3)
11. Shiruru alidak - (7)
14. Aginüdaktsü - (3)
16. Shishilemba dang amshiba - (3)
17. Süngküm - (5)
18. Tenüng majung - (6)
19. Temzüng - (5)

LANGTSÜNGLEN

- 1. Nguyutep - (5)
2. Tetsüng agi ao - (4)
3. Tajungba akümsü merang - (6)
4. Temokong masü - (6)
7. Saku - (4)
10. Lema agütsü - (4)
11. Kiochtsü yangluba tetong - (6)
12. Tzü mamongba süngo tou - (6)
13. Aoer takolak sobutsü - (5)
15. Alia - (4)

OLONG PAITEP # 6706 TELANGZÜBA

TIPIEN:

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN:

- 1. Yimti, 2. Amen, 4. Shiner, 5. Alaka, 6. Satan, 9. Putet, 10. Tembar,
11. Tatok, 12. Amang, 14. Jala.

NAI-A YA METETTER MA



Matchstick agi yangluba Eiffel Tower model talangtiba yanglutetogo aser iba atema Guinness World Records (GWR)-i kuli agütsüogo.
GWR-i iba ya magizüktetba atema kanga sasar ta ashi aser model-enthusiast Richard Plaud nem tenüngsang agütsü. Arishi küm 47 tain Plaud-i iba model yanglutsü atema küm 8 agi. Pai matches 706,900 aser glue seret 23 agia Eiffel Tower model yanglu.
Plaud ya France kübok Montpellier-de-Médillan nung alir aser pai December 27, 2024 nü tower yangluzüker GWR den tongtepratep. Ajisüaka GWR-i record atema "commercially available" matches dang amshitsüla ta mezüngbo ashi saka February 15, 2024 nü parnoki iba tower agizüka kuli agütsüogo. February 14, 2024 nü GWR-i 7.19m (23ft) tower ya matches tai (wrong) agi yanglu ta ashi saka February 15 nü parnoki kuli agütsüogo. Iba world record ya taoba mapang Lebanon nungi Toufic Daher-i nguteta liasü aser pai 2009 küm 6.53m (21ft) Eiffel Tower ka yanglutet.

Delhi nung Manipur nunger lungkak aiter 9 apu



Imphal, February 23, 2024

(Agencies): Delhi police-i Manipur nungi lungkak aiter nisung 9 apu. Parnok yagi Manipur nung yimjung aser teputep atema takhangba agütsür.

Lamyamba Irawat Memorial Integrated Trust, (LIMIT) president Malem Thongam lenisüba kübok lumia lungkak aitba sentong tenzüka saka Burari police station, Delhi telok kati

noktang.

Brihostibar nikongdang 5:00 ako meta LIMIT president den volunteers 8-i Arts Faculty, Delhi University jakdang 144, CrPC alema inyakba atema apu.

LIMIT-i Delhi Meitei Coordinating Committee (DMCC) aser Manipuri nunger den angatetepa ayongzüik.

Osang angazükba agi parnoki police lockup nung maneni lumia lungkak aiter.

Lungkak aiterem ket nung "Hunger strike to restore peace and harmony in Manipur", "Update NRC to Manipur", "Abrogate SoO" aser "Restore peace in Manipur" placards aser banners angu.

ATTSA-i BJP dang Dibrugarh MP Rameswar Teli melentsü akhanger

Dibrugarh, February 23, 2024

(Agencies): Assam Tea Tribe Students' Association (ATTSA), Dibrugarh district unit-i BJP lennirtem dang Dibrugarh MP Rameswar Teli nem BJP candidate ka ama Dibrugarh constituency nungi metoktepdaktsüsü shiogo.

BJP lennirtem Rameswar Teli nem Dibrugarh Lok Sabha menden nung maneni toktepdaktsüra BJP lennirtem tea garden tesemtemi marudaktsüsü. Onoki pa dak temlung masür kechiyong pai Parliament nung süngolu ayimba kin indang tebilemstütem mebenok" ta pai ashi.

"BJP sorkar aser tang teinyakdak Dibrugarh MP-i onok dang takhangba inyaktsü nangzüik. Election jakdang parnoki nangzüik saka election nung takok anguba sülen onok takhangbatem atema meinyaktsü" ta paisa ashi.

"Lok Sabha elections nung onoki Dibrugarh menden nung Rameswar Teli tokteptsü memulunger kechiyong tesüiba küm 10 tsüngda pai süngolu ayimba kin atema kecha meinyaktsü. Onoki BJP lennisüba dang tejak tasen ka agütsüsü ayongzüikogo" ta ATTSA, Dibrugarh President Bimal Bagh-i ashi.

"BJP lennirtemi Rameswar Teli meleni Dibrugarh Lok Sabha menden nungi tejak tasen ka yoktsüla. Onoki ST status, land patta aser tanga onük aika atema inyaker saka Rameswar Teli-i ajak metetaka ola madok aser onok pusema kecha meinyak" ta Bimal Bagh-isa ashi.

"Ali yokyayokjirtem aser süngolu kiburtemi alu yokdoker saka Dibrugarh MP-i iba ya metetaka iba atema ola ka danga madok. Bokel tea garden land nung bigha 500 aser Suraj tea estate nung bigha 64 yokogo. Dibrugarh nung tea estates aika ir aser iba nung tea garden lands aika yokdokogo" ta Dibrugarh district secretary Lakhindra Kurmi-i ashi.

Sonowal-i NEIAH Shillong nung mapatong aika tenzüksü

Guwahati, February 23, 2024

(Agencies): Union Minister of Ayush and Ports, Shipping & Waterways Sarbananda Sonowal-i North Eastern Institute of Ayurveda and Homoeopathy (NEIAH) nung mapatong aika tenzüksüogo.

ajanga Northeast aser talisa Meghalaya nung healthcare delivery system tajungba kümogo. Ayush system mozütem amshia doctor aser nüboritemi tajangzüik angur" ta Sonowal-isa metetdaktsü.

kübok Mawpat aser Myllem Block nung arishi küm 18 nungi 45 tsüngda alir nem Iron Deficiency Anemia (IDA) yarir" ta Ayush Minister Sonowal-isa ashi.

Mawdiangdiang, Shillong nung aliba NEIAH campus nung Ayush Minister Sonowal-i Guest House lapoktsü aser Administrative Building, Pharmacy Building, Boundary wall, Periphery Road, external electrification, entry & exit gates yanglutsü atema lung azüngtsü.

"Sorkari NEIAH ulushitsü tenangzüikba lir aser linük nung Ayush indang human resource institution tajungtiba kümdaktsüsü. Yaküm küm sorkari NEIAH ulushitsü atema Rs. 45 crores agütsüogo. NEIAH nung Rs capacity expansion atema Rs 217.02 crores endoktsü" ta paisa ashi.

NEIAH-i Panchakarma, Ksharasutra, Uttarabasti aser Yoga ajanga shirangertem yarir. Onoki kaketshirtem nem specialised Panchakarma Technician programme ajanga tesayubatem agütsür, ta paisa ashi.

"NEIAH ulushiba ajanga asenoki angazüktsü, amaliteptsü aser tashi itshitsü maongka angur. Iba reju nung Ayurveda aser Homoeopathy nung nisung mongin meyirjang ka jungnüa training agütsüogo" ta pai ashi.

"Smit, East Khasi Hills district nung Peripheral OPD services tenzüksü aser iba ajanga yimtsüng 20 nung nisung 40,000 ajangzüksü. NEIAH-isa Ayurveda Hospital nung Swarnabindu Prashan Sanskar (Ayurvedic Immunomodulation in Children) lapokogo. Iba ajanga sorkari East Khasi Hills district

Iba sentong nungsa Union Minister of State for Ayush and Women & Child Development, Dr Munjapara Mahendra online ajanga aden.

"Prime Minister Narendra Modi indang Swastha Bharat alizüng atongtsü merandang iba

Sentong nungsa Ayush Secretary Vaidya Rajesh Kotecha; Northeast Hill University (NEHU) Vice Chancellor Prof PS Shukla; the Joint Secretary, Ministry of Ayush, BK Singh aser Director, NEIAH Prof Neeta Maheskar nunger aden.



Assam nung mission Bashundhara 2.0 campaign nung shilem ka ama Public Health, Fisheries, Skill Development and Tourism Minister Jayanta Malla Barua-i February 23, 2024 nü Khilonjiya nunger nem land pattas agütsüogo. Assam sorkari mission Bashundhara 2.0 campaign ya Khilonjiya nunger nem ali temeten agütsüsü nükjidong nung tenzüka agir aser tanü Duliujan assembly constituency nung nisung 3,757 aser Naharkatia assembly constituency nung nisung 4,282 nem land pattas lema agütsü.



# Israel-i central Gaza nung nisung 40 tepsetogo

**Deir el-Balah, Tsüklai/February 23 (Agencies):** Gaza nung rara tembangdaksütsü atema sensaksem agitsü aser Tel Aviv-i rara tembangba sülen Gaza koka asütsü iba indang sentong ka yanglur aliba mapang Israel military-i central Gaza nung Palestine nung 40 tepsetogo.

Israel nung sepaitemi Deir el-Balah nung nisung 100 dak tema yirutsüogo, ta Gaza sorkar media office-i Brehostibarn aonung sangdong ka ajanga metetdaksü. Parnokisa asürtem ya timba tanur aser tetsürtem liasü, ta ashi.

"Tang ozüing alema kechi inyaksangshidar iba ya onoki America, international community aser Israel dak tai tongloksür aser onoki Israel army-i civilian tem anema inyaksangshida tangsa tang anendaksütsü atema alima kintem dang akhanger," ta kasa sangdong ajanga ashi.

Southern Gaza nung Rafah yimti nungi Al Jazeera indang osangbener Tareq Abu Azzoum-i ashiba agi, jelia osang magütsü nisung aliba kitem maka liasü.

Kamas puri Hokolbarnü sangdong ka ajanga ashiba agi, nisung aliba kitem amakba ajanga Israel-i meimchir temeden aser temzüng ozüing kecha hau ta maliba alima kintem dang sayur.

October 7 nü rara tenzüka sülen Israel army-i Palestine nung 29,000 dak tema tepsetogo, kong tanur aser

tetsürtem timba densema lir, ta Gaza nung Ministry of Health-i metetdaksü.

United States National Security Council otongdar John Kirby-i Brehostibarnü ashiba agi, ceasefire benoktsü aser tepuokertem melenteptsü atema sensaksem kanga takok ngua odar.

Anogo asem tashi sensak asemba sülen Hamas lenir kar Hokolbarnü Cairo, Egypt toktsürogo. Iba sensaksem atema Israel Ato Kilonser Benjamin Netanyahu-i Israel nung lenirtem ka danga meyoki liasü.

Egypt aser Qatar na teyongtsüi ia sensaksem ka aliba ya maneni Hokolbarnü Paris nung akatsü imlar aser Israel-ia iba sensaksem nung shilem agitsü atema lenirtem yoktsü imlar. France yimtiba nung ceasefire asoshi benokba agizütsü akok, ajisüaka osang tejangja memetet.

Gaza tarutsü atema Tel Aviv-i sentong yangluba mapang Israel-i maneni iba tesem kanga mejungi maka arudar. US aser tanga linüktemi ashiba agi, parnoki Palestine nung aliba tesem balaka kümdaksütsü imlaba lemsatepogo, ajisüaka Israel tebilemba balaka lir.

Rara tembangba sülen Israel-i, Gaza yimsü asütsü atema linük mesüra kiralongrar pusemertem den kecha tesendaktep maliba "local officials" tem amenokner, ta Times of Israel sangdong ka ajanga metetdaksü.

Osang ajangsa, Israel

military-i koda West Bank nung Palestine nung aliba tesem nung sadem sadema inyaksangshia arudar, yamaji Gaza Strip nunga inyaksangshitsü, ta kasa sangdong ajanga metetdaksü.

Netanyahu indang sentong nungsa, Gaza nung temzüng ozüing aziüoktsü atema dak alak ajunga demilitarize asütsü shia lir, ajisüaka Palestinian Authority (PA) ka indang shisema mali. Washington-ibo rara tembangba sülen Palestinian Authority (PA) nem iba tesem aziüokdaksüner.


Israel Ato Kilonser shibai iba sentong ya pa indang security cabinet den lemsatepa liasü, pai taoba mapang ashiba agi, Gaza nung rara tembangba sülen PA ya sentong balala benoka inyakba nung shilem ka masütsü.

Israel-isa, strip den Palestine nung aliba arrtsü nung "buffer zone" ka amenoktsü asoshi sentong lir. Iba ajanga Gaza indang frontiers tilaba kümdaksütsü, koba United Nations-i anema arudar.

Iba sentong ataloktsü atema Israel military-i, parnoki "buffer zone" amenoktsü sentong aliba tesem ya tayimtsü aser bomb tulu aser bulldozer tem amshia raksaja arudar.

Analyst Ben Friedman-i ashiba agi, US Secretary of State Antony Blinken-i, Gaza nung Palestine nung taküm atema süoki ia bilemba lemsatepogo, ajisüaka Washington-i Israel anema nokdaksü memulunger.

# Sür Küm 50 Süiaka Amatsü Makok (1974 - 2024)



Lt. A. SÜSÜ JAMIR (Changtongya)

Temeim Oba, pongmang ka ama nai onok ajungbena toktsür or tanü küm 50 jungaka onok mulungjang nung na teti lir. Alima nung tia balala ajangdanga aodang ne temoatsü aser tawabangba ajanga onok ajak arishia temjena alir.

Na akümidang mapa tajung inyaka yutsüba onoki kodanga mamar aser iba temoatsü süngjang tanü tashi onoki agir.

Tanü onoki na bilemteta asen Tebu Tsüngrem dang sarasadema amunger.

Oba, na aliba lima nungjagi onok asoshi sarasademja kecha merongjeni yangji anisüngzüka liangma.

- Temeim Kinungtsü, Chirnur aser semchirtem.

## Office Of The KELINGMEN SENSO MONGNDANG

P.O-Changtongya-798613, Dist-Mokokchung: Nagaland

Ref. No:

Date: 23-02-2024.

### SANGDONGER

Kelingmen Senso Inti Mongdang lemtet nung ajemdaker tanü anogo 18-01-2024 nung Kelingmen senso Sanen Luden mena Kelingmen lushi nung Yi aser Mozü Mora ayokba aser abenba temzüng nung aliba ama nokdangtsü asoshi "Action Committee" ka shimer.

Aser iba "Action Committee" ajanga Kelingmen senso chanu mesüra bendangera-sang aibelener ajak temzüng nung aliba ama temerenshi tulu alitsü iba osang ajanga sangdonger.

Sd/-

(T. Supong Jamir)

President

Kelingmen Senso Mongdang

Sd/-

(I. Bendang Jamir)

Secretary

Kelingmen Senso Mongdang



## National Financial Reporting Authority

7<sup>th</sup>- 8<sup>th</sup> Floor, Hindustan Times House, 18-20 K.G. Marg, New Delhi-110001

NFRA-i AllIndia mesüra Central Civil services officer/official/ State sorkar aser Union Territory Sorkar officer/ RBI/Public Sector banks/ Sorkar Finincial Institution/Regulatory Bodies/Public Sector Undertakings/Autonomous officer tem aser Statutory Bodies/Tanga Sorkar Institution tem/ Armed force nungi 22.01.2024 nü NFRA nung mapa tazüing aliba süngdaksütsü asoshi metetdaksüba atema application jaoker.

- (i) Executive Director - 01 post
- (ii) Personal/ General Assistant (Grade I) - 03 posts
- (iii) Personal/ General Assistant (Grade II) - 03 posts
- (iv) Personal/ General Assistant (Grade III) - 04 posts
- (v) Senior Private Secretary - 02 posts
- (vi) Private Secretary - 01 post
- (vii) Driver - 02 posts

Item mapatem ya website: <https://nfra.gov.in> nung osang tejangja agüja aliba dak ajemdaker koma apeter yamaji deputation mesüra mapang tatsüka atema contract basis mesüra deputation/re-employment yimya nung shimtsü. Tejangrar aser temsüa aliba officer/official temi agüja aliba formate nung jenjang shitak agia Employment News nung advertisement agütsüba anogo nungi ita ana mesüra iba masü dang apply sütettsü.

cbc 07122/12/0003/2324

# US-i Iran nem tenokdangba tasen agütsütsü nangzük

**Washington, Tsüklai/February 23 (Agencies):** Russia-i Ukraine amakba mapa teyari agütsütsü atema prangbong injang aser hadir balala ayokba atema White House-i Iran nem tenokdangba tasen agütsütsü tenangzükba agütsüogo. Iba den Tehran-i Moacow dang ballistic missile tem yokra takaratiba nung tenokdangba tesashi agütsütsü ta tekümdangtsü metetdaksüogo.

National Security Council otongdar John Kirby-i Brehostibarnü ashiba agi, taruba anogo ishika tsüngda U.S-i Iran nem tenokdangba talila agütsütsü. Ukraine den raraba mapang Russia nem drone aser tanga technology agütsüba atema iba tenokdangba agütsütsü. Paisa, Kyiv dak amshitsü asoshi Russia nem ballistic missile tem agütsüra tenokdangba talila agütsütsü aser United Nations nunga jenjan tapet agitsü, ta metetdaksü.

Russia-i Iran ket nungi ballistic missile tem alitsü merangba indang US-i ita aika tekümdangtsü metetdakja arudar. Tehran den military dak sendakba nung tesendaktep

akangshiba melena ballistic missile tem alizütsü Russia-i meranga arudar.

"Onoki Iran nungi Russia-i missile bener aoba indang osang tejangjaba memetet. Ajisüaka parnoki iba jenjang magitsü ta mamangtsüa kecha mali," ta Kirby-i ashi.

Paisa, Iran-i iba jenjang agira, alima kintemi takaratiba nung kanga sashia telangzüba agütsütsü ta tenangzükba agütsür, ta ashi. Pai ashiba agi, US-i iba ken o UN Security Council dangi abentsü kong Russia-i kecha mesütettsü.

"Onoki Iran nem tenokdangba talila agütsütsü aser Europe aser tanga tesem nung onok den sendakteper aliba linüktem den longjemer telangzüba agütsütsü asoshi inyakteptsü," ta Kirby-i ashi. Maneni Kirby-i, "taoba mapang Russia aser Iran na military tsütsü tesendaktep yangluba dak sendakba nung onoki jenjang agiba sayuogo aser tarutsü nunga onoki iba amala jenjang agitsü. Iran-i, Ukraine den rara nung Russia nem teyari agütsüba atema onoki taruba anogo ishika tsüngda tenokdangba talila

agütsütsü. Iran-i Russia dang ballistic missile tem yokra onoki ano jenjang talila agitsü renema lir," ta ashi.

U.S-i, Hokolbarnü Russia nem tenokdangba tasen agütsüba sangdongogo, koba Ukraine nung rara tenzüker küm ana ajungba aser Putin anemer Alexei Navalny, Russia indang penal colony ka nung asüba dak sendakba nung telangzüba agütsüba lir.

# Ni April ita office toktsütsü: Senegal tir Sall

**Dakar, Tsüklai/February 23 (Agencies):** Senegal tir Macky Sall-i, imla aliba ama pai April ita office toktsütsü ta shiogo, ajisüaka pai tir election, koba Deobarnü agitsü liasü, iba atema anogo mesangdong.

Sall, shiba April ita term tembangtsü lir pai tir mapa atema shiba tokteptettsü, iba dak sendakba nung ken o mebenteti lir ta shia election ya December ita-i thinenja liasü. Ajisüaka pai iba jenjang agiba ya Senegal indang Constitutional Court-i ozüing alema lir ta shiogo. Pai pa election nung metokteptsü ta shiogo.

"April 2, 2024 nü Senegal tekolak ama kü mapa

tembangtsü," ta tir-i tenangzükba agütsüogo, Brehostibarnü interview ka nung ashia aser iba ajanga pai imlaba dang nungi tir mapa mapang talangba abentsü ta bilema aliba jangjatsüogo.

"Election agitsüba anogo dak sendakba nung sensaksemba sülen kechi lemtetdir aji ata lidi," ta pai ashi. "Election ya April 2 madongdang mesüra iba sülen agitettsü," ta paisa shisem.

Pa mapa nungi anentsüba anogo matong tsüngda tir tasen ka shimtsü meshimtsü iba indang mejangjai lir.

Constitutional Court-i sorkar dang election takaratiba nung agitsü atema anogo ka shimtsü tetuyuba agütsüogo aser Sall-ia iba tetuyuba sülen anidaksü

tenangzükba agütsüogo, ajisüaka tang tashi anogo meshim-i lir. Sall-i Brehostibarnü ashiba agi, pai yimden yimsüsürtem den taruba hopta sensak asemtsü aser iba sülen election atema anogo aser pai mapa toktsüba sülen koma asütsü iba indang jangja akümtsü.

Senegal ya West Africa nung democratic linük ajak rongnung tashi taittiba ta züngshir, saka election dak sendakba nung mangatettep adokba sülen linük mepetmesüi ai aser nüburtemi longkak ait tenzüka liasü. Longka aitba mapang security force-i nisung asem tepset aser aika yiruja liasü.



## Aubameyang Europa League nung goal timtiba idaktsüba asayar kümogo



**Tsüklai/February 23, 2024 (Agencies):** Hokolbarnü Shakhtar Donetsk den Europa League nung knock-out round play-off asaya nung Pierre-Emerick Aubameyang-i goal ka idakja pa iba asayamung nung goal timtiba idaktsüba asayar kümogo.

Iba goal idaktsüba sülen Aubameyang-i Manchester United forward Radamel Falcao ajateta iba asayamung nung goal timtiba idaktsüba

asayar aküm. Asayar anapronglai goal 30 idaktsür liasü aser tang Aubameyang-i goal ka talila idakja pa ajak dang timba kümogo.

Goal ya 2009 küm nungi zünga arudar. Iba küm UEFA Cup nungja Europa League-i melenja liasü. UEFA Cup asayaba mapang Sweden nung Henrik Larsson-i goal 31 idakja pa ajak dang temaba jenjang nung liasü aser tang Aubameyang tena kasasa kümogo.

Europa League nung Pierre-Emerick Aubameyang sülen tanabuba jenjang nung Bilbao striker Aritz Aduriz aser AS Roma striker Romelu Lukaku na lir. Tenati goal 26 idaktsür lir. Tasembuba nung goal 22 idakja taoba mapang Arsenal forward Alexandre Lacazette aser taoba PSG asayar Kevin Gameiro na lir.

P i e r r e - E m e r i c k

Aubameyang ya mezüng 2008 küm AC Milan nung asaya tenzük aser iba sülen pa Europe nung club aika nungi asayaago. Pai club pezü nungi asayaba mapang Europa League nung goal idakja liasü. Aubameyang-i Arsenal nungi asayaba mapang goal 14, Borussia Dortmund nungi ti aser Barcelona nungi asayaba mapang goal ana idaktsü aser iba sülen pa taoba küm Chelsea nungi Marseille-i ao. Marseille nungi asayaba mapang pai Europa League nung goal tenet idaktsür lir.

Hokolbarnü asaya nung Shakhtar Donetsk nungi asayar Heorhiy Sudakov-i penalty ka ajanga mezüngbuba goal idaktsü. Iba sülen minute ter dang lir Aubameyang-ia goal ka idakja goal kasasa aküm. Marseille atema ano Ismalia Sarr aser Geoffrey Kondogbia nati goal kaka idakja parnoki asaya goal 3-1 agi koka liasü.

## Season tembangba sülen Joe Hart asaya nungi anentsü



**Tsüklai/February 23, 2024 (Agencies):** Celtic goalkeeper Joe Hart-i, pa tang asaya aliba season tembangba sülen professional football asaya nungi anentsü ta sangdongogo. Pa küm 20 tashi asayaba sülen tang asaya nungi anentsü telemtetba agiogo.

Brehostibarnü Celtic TV den jembiba mapang arishi küm 36 tain asayar yagi, pa temangbo kanga dang anema lir ama bilemer saka Glasgow nung asayaba ya tatembangbuba asütsü, ta ashi.

Hart-i, "June sülen ni professional football asaya nungi anentsü, ta osang agütsüner. Ni iba atema mapang tatsüka bilema aruogo. Asaya nungi anentsü atema mapang tapet mapet kecha mali ta bilemer," ta ashi.

Küm 12 tashi Manchester City nungi asayaba mapang Hart-i, Premier League ana benogo aser pa Birmingham, West Ham, aser Torino nungia

loan nung oa asayaago. Pa Celtic nungi asayaba mapanga takok tajung nguogo. Pai Scotland nunga league anaben tashi kokogo aser pa indang career nung cup medal trok tashi ngutetogo.

Asaya aruba indang jembiba mapang Hart-i, pa nübu kanga junga aliba mapang kanga junga asayatetba indang lemsatet, ajistiaka joko tain akümer ta ashi. "Mapang agi shinga matar ta ni meteta lir. Kü temang agi ni retire mesüdaktsüner, aser asaya nungi anentsü telemtetba agiba kuli rongnung aji ka liasü," ta pai ashi.

Hart shiba 2004 küm mezüngbuba Shrewsbury nung asaya liasü, pa 2021 küm Tottenham nungi Celtic nung oa aden. Celtic pur iba season nung asaya 13 asayatsü anunga lia temaba jenjang nung aliba Rangers pur point ana agi memenepe lir.

Asaya nungi anentsü lia Hart tang Celtic pur nem takokba tashi teyari agütsütsü atema rengloker asayadar. "Ni tang asaya nung dang rangloker asayaner. Ni tinyaktsü kechi ali iba dak rangloker lirnür aser ni asayaba iba club atema asayaba moapu nung temulung tanüla ajak bendanga agütsüner," ta Hart-i ashi.

## Toni Kroos Germany team nungi maneni asayatsü

**Tsüklai/February 23, 2024 (Agencies):** Real Madrid midfielder Toni Kroos-i ashiba agi, pai pa Germany team nungi maneni asayatsü atema mulunga agizükogo.

Germany national team coach Julian Nagelsmann-i, kidang European Championship masaya tsüngda linük tenung nungi asayatsü atema mepishiba pai agizükogo.

Arishi küm 34 tain Kroos ya küm asem tashi Germany tenung nungi masayai arudar. Taoba European Championship nung Germany team round of 16 nung tsükba sülen pa tang



tashi khen danga asaya mali.

"Ni March ita nungi ano Germany team nungi asayatsü, kechiyong national team coach-i kü dang team nungi asayatsü atema asüngdangogo aser Euro nung nisung timba kati bilemba

dang nungi team-i tajungba asayatetsü ta ni amanger," ta Kroos-i Instagram nung zülutsü.

Germany team March 23 nü France den friendly asaya ka asayatsü lir aser iba sülen anogo asem lir ano Netherlands den asayatsü.

European Championship koba June 14 nungi tenzük asayatsü lir, iba asayamung nung Germany team group stage nung Scotland, Hungary aser Switzerland den asayatsü lir. taküm iba asayamung ya Germany nung ayongzük asayatsü.

## Mongsanger semchirtem mezüngbuba... (Tapak 1 nungi...)

Mission mapa tulu inyaktü dang jembir, ajia tim, saka asen kibok nung teinyaktsü jenti lir, ta paisa ashi. Tamangba yimsü asenoki tama tenzük aser asen lima nungi sama-a odaktsüra koda? ta pai tebilemdangtsü olen ka shisem.

Politic tsütsü onük kar lemsatetpang, mapang ka Mokochung nungi lenir tajung adoka Naga lima rangben ramoka yimsü asü, yimsüsür tazüngtsüba asenok teimba saka asenok tanitaker dang, anungji, itemji aroka shisadangtsü mapang tongogo, ta pai ashi. Ibai tongtibangsa asenok dak tenük merem aliba ajanga lir, anungji, nukmerem toktsür lungjema lira, tarutsü asen lima mangdang tesangwa angur, ta paisa melenshidaktsünüba o ka shisem.

Sobaliba tsütsü ashidang, Aorji sobaliba nung takang aser aji ajaki nukshia ajizüktsü meranger, saka tanü lanu putu talisa bendanglima nung Aor o Aor na ajurutepdang pei tetsü oshi agi masü "Nagamese"

mesüra "English" agi dang jembiteper. Asenoki anüolen sobaliba ajizüka beshitsü meranger aser asenoki America nungjerji tejakleni aoba kin amai jembir aser nukshia repranger, saka tanü parnok sobaliba benjar bushiba mapang ka lir, ibaji talisa tera amatokba ajanga lir. Aji oda, Aortema pei teraji mamatoki kanga junga wazüka ayutsü asoshi paisa ajungshi.

Tarutsü nukla atemaji jembidi süra 'education' rangloksüla, degree angubaji masü saka tanü putubo na azüngba amaji nai taküm liteta aor amor, ta asübaji kanga tongtibangba lir, ta paisa shisem.

Paisa saisabong tsütsü temulung agütsütsü asoshi ashidang, Nagaland nung saisabong tsütsü repringdangra Mokochung ya mezüngpur lir, saka tanüba tetoktepba balala nung asenok tangar sülen lir. Saisabong ya alima nung ngujem aliba luyim tongtibang ka kümogo, aji oda, Nagaland sorkaria sports nung temulung

agüja arudar, anungji, sports junga asayaba ajanga mapa angutsü lenmang aika lapoktsü, anungji, itemji meteta talisa tsüraburtem tangatetba melenshir pei chirnur shirnok dak sempet lir parnokji ajungshitsüla, ta paisa ayongzük.

Sentong nung Rarentemjen Jamir Tatar (Ungma) aser Tongpangkumzuk Jamir (Ctn) na menden liasü. Onentiba Jamir Tatar (Ungma), Imtitemsu Jamir Tatar (Ctn), T.N Meren Jamir Retd. IFS, Imtilepuk Jamir (Ctn), Takoyanger Jamir Tatar (Ungma), Dr. Limaakum Jamir Retd. Director (Dimapur), Bendangtoshi Jamir (Anaki Yimsen), Imtinukshi Jamir (Kelingmen), Rongsentemjen Jamir (Chubayimkum), Nungsangmeren Jamir Tatar (Ungma) parnokia shilem balala agia jembir. Sentong nung Rev. T. Meren Jamir Missionary den temoatsü meshia sarasadem. Dr. S.C Jamir sentong nung medentetaka pai bener yokba shiti ka zünga metetdaksü.

## Kishan & Iyer na nem central contract magütsütsü akok

**Mumbai, Tsüklai/February 23 (Agencies):** Tang asaya aliba Ranji Trophy nung masayaba sülen Ishan Kishan aser Shreyas Iyer na nem central contract magütsütsü akok. BCCI-i central contract asayatem yakta sangdongtsü imlar.

"Ajit Agarkar-i anir selector temi 2023-24 season atema central contract asayatem list teyangluzüküer dang lir, koba BCCI-i yakta sangdongtsü. Kishan aser Iyer na iba list nungi agintsü akok, kechiyong BCCI-i tetuyuba agüjaka tena domestic cricket masayar," ta source kati TOI dang ashi.

Kishan, December-January ita South Africa nung oa asayaba sülen tang pa jurila mapa kar aliba ajanga mapang talangka masayai arudar. Pa Mumbai Indians captain Hardik Pandya den Baroda nung training agidar, saka pa Ranji Trophy nung Jharkhand team nungi masaya. Kasa mapang nung Iyer-a Assam den Mumbai team Ranji Trophy league match asaya

tatembangbuba nung masaya aser Hokolbarnü nungi tenzük Baroda den Ranji Trophy quarter-final asayaba nungi shilem magir.

Iyer-i Mumbai Cricket Association dang pa teberem nung timtem aliba ajanga masayatetsü ta shiogo, saka National Cricket Academy nung sports science and medicine tekolakba Nitin Patel-i, BCCI aser national selector tem dang Iyer asayatsü temsüa lir ta email ajanga osang agütsüogo.

Ajisüaka Iyer den sendaktepa aliba source kati ashiba agi, pa teberem yiruba ajanga kümdangshia alitsü atema England den tang asaya aliba Test nung pa masayadaktsüi arudar.

BCCI secretary Jay Shah-i, central contract asayar aser India A cricketer tem tang asaya aliba Ranji Trophy nung masayara tai matoktsü aser iba dak sendakba nung chief selector Ajit Agarkar nem tashi ajak agütsüogo, ta tekümdangtsü metetdaksüogo.

**BILEMDANGANG**

"Tia tensa balala nem tazüokdaksü."